

Conflict denter luf e tgauns?

FOTO HANS HUONDER



(fmr/hh) Igl Uffeci da catscha e pesca dil cantun Grischun dat cussegls als possessurs da tgauns pil diever dalla catscha en loghens cun lufs. Quels valan bucamo pils possessurs da tgauns da saung alla tscherca dalla selvaschina blessada, mobein era per tgauns pil diever dalla catscha bassa. La populaziun carschenta da lufs savess schizun perclitar la catscha bassa cun tgauns. *Pagina 5*

Ina catscha periclitada


La catscha cun tgaun – ina veglia tradiziun – savess bein spert daventar l'unfrenda dil luf – era el cantun Grischun

DA HANS HUONDER/FMR

■ Da vegl enneu ei il tgaun buca mo in bien accumpagnader dil carstgaun il mintgadi, mobein era in cumpogn da catscha. Cul diember carscent da lufs ei quella catscha denton pli e pli periclitada. Attenziun dil luf vegr denton era pretendida dils menaders dils tgauns da saung. El cantun Grischun vegr da principi differenziau denter duas specias da tgauns pil diever dalla catscha. Dad ina vart ei quei tgauns da saung che vegnan en funcziun quei mument ch'in animal selvadi ei blessaus e sto vegr en curetgs. Da l'autra vart ils tgauns da catscha ch'ein lubi per la catscha bassa, en emprema lingia per la catscha da lieurs ni utschals e per apportar. Ton per tgauns da saung sco per tgauns da catscha ensira la preschientscha da lufs in potenzial da prighel. Ils lufs vesan ils tgauns sco concurrents e surtut leu nua ch'igl ei se formau in triep defendan els lur revier, sch'eis sto esser cun mazzar quel.

Discussiuns intensivas

Ils possessurs ed allevaturs da tgauns da catscha svizzers ein organisai el cantun Grischun ella seczium dil Club da tgauns da catscha dalla Svizra. Quella dumbra 210 commembra e commembers. La discussiun davart il problem cul luf ei buc actuala leu pér ussa. «Quei ei in tema che vegr discutaus intensivamein tier nus», di *Fritz Keller* da Termin che presiede la club dapi rodund sis onns. El targlina lu era buca culla proxima constataziun: «Sche quei va vinavon aschia cul svilup dalla populaziun da lufs ei la catscha cun tgauns morta el cantun Grischun.» Il problem pils tgauns seigi surtut leu nua ch'eis detti famiglias da lufs: «Singuls lufs ein probablamein buc in problem aschi grond, els vegnan plitost a seretrer en preschientscha d'in tgaun. In triep tolerescha denton buca tgauns ni lufs jasters en siu territori.» Avon ch'in tgaun da catscha seigi madirs per far bein catscha drov'e bia lavur. El ei denton buca mo in amitig duront catscha, mobein era igl ulterior temps. «Negin resca da



In tgaun da saung duront in exercezi. Sco el suonda era il luf ils fastitgs ni il saung digrau dalla selvaschina blessada.

FOTO HANS HUONDER

piarder siu tgaun», di Keller. Ei detti bein aunc loghens el Grischun senza preschientscha permanenta da lufs, mo gleiti seigi quei buca pli il cass. «Nus sperein che la lescha da catscha federala vegrni acceptada. Cun sittar lu in ni l'auter per tener en rama la populaziun sa ei esser ch'ils lufs daventan pli spuretgs, forsa era enviers ils tgauns», di Keller che va a catscha bassa cun tgaun dapi 26 onns. Per mantener e promover la catscha cun tgauns – ina veglia e biala tradiziun – drov'e era persunas ch'ein promtas da tener in tgaun ed era giuvens che vegnan suenter: «Nus havein gia survegniu signals da persunas ch'han gronds dubis pertuccion tener in tgaun da catscha egl avegnir.» La finfinala seigi ei lu denton era aschia ch'il cantun spiardi cheutras entradas da patentes.

«Mintgin sto saver sez»

Buca nunproblematica ei la situaziun dil luf era pils menaders cun tgauns da saung. «Enteifer nos exercezis ei quei tema secapescha era vegnius discutaus, mo la finfinala sto mintga menader d'in tgaun giudicar sez la situaziun», di il guardiaselvaschina

Gion Bundi da Zignau ch'eis cau dalla gruppa dalla Surselva dil Club da tgauns da saung dil Grischun. Difficil ei il mument ch'il menader sto decider schebein el vul schar liber il tgaun dalla corda, savend che la selvaschina blessada ni forsa schizun morta ei ella vischinanza. «Nus havein l'incumbenza d'encurir ina selvaschina blessada. Quell'incarica ei adina gia stada cumbinada cun prighels pils tgauns, seigi entras il traffic ni era la topografia dil territori. Uss ensiara il luf in ulterior potenzial da prighel», constatescha Bundi. Interessants savessi in cass da precedenza futur esser: «Tgei schabegia quei mument ch'il menader terminescha buca sia lavur pervia dil prighel dil luf ed igl animal blessau dil catschadur vegr anflaus pli tard. Lu vegr il menader a stuer argumentar daco ch'eis ha buca terminau l'aciun.» Bundi cussegia als menaders da tgauns da s'informar tier la survigilonza da catscha avon ch'entscheiver culla lavur. La gruppa dalla Surselva dil Club da tgauns da saung dil Grischun dumbra 18 menaders activs cun tgauns ed ad els sa Bundi dar sulettamein in cussegli: «Empruar da s'endisar aschi bein sco pusseivel vid la situaziun nova.»

Co sedepurtar?

Igl Uffeci da catscha e pesca dil cantun Grischun ha publicau sin sia homepage informaziuns co sedepurtar en loghens cun lufs ni era en in eventual contact cun in tal. Denter auter constatescha el ch'in animal blessau ei per in luf ina fontana da vivonda potenziala. Gest tenor situaziun defende il luf quella preda, per exempli era enviers in tgaun da saung. Per quei motiv duei vegr fatg attenziun alla tscherca d'ina selvaschina blessada. Ei vegr cussegliau da schar liber in tgaun dalla corda mo sin cuorta distanza. «Fruntan tgauns da saung suenter liunga tscherca e lunsch naven dil menader sillla selvaschina e leu sin lufs vegr el spuentaus ni schizun attaccaus», scriva igl uffeci. Menaders da tgauns ch'arrivan el liug dalla selvaschina e fruntan leu sin in luf duein sefar valer cun ferma vusch, lu vegr il luf a seretrer. Ei quei buc il cass eis ei il meglier da s'allontanar dil liug ed annunziar il cass alla survigilonza da catscha. Tenor igl uffeci sa ei era dar situaziuns difficilas cun tgauns duront la catscha bassa: «Frunta in tgaun duront si'occupaziun da catscha sin in luf sa ei sedar ina situaziun critica. Surtut in triep da lufs sa veser il tgaun sco concurrent ni in che penetrescha en lur revier. Igl ei denton era pusseivel che lufs vesan in tgaun sco preda.»

Agir sistematic

Il problem che sa sedar cun tgauns da saung e tgauns da catscha ei enconscents era en outras tiaras, aschia la Tiaratudesta. L'Uniun dils catschadurs dalla Tiaratudesta ha publicau in flyer che dat differents cussegli als possessurs da tgauns. Avon che lantschar ina catschada informescha il menader dalla catscha ils menaders da tgauns davart eventualas sentupadas cun lufs e las rescas che pon sepresentar. 20 entochen 30 minutais avon ch'ils tgauns sappien far catscha vegr il territori passaus dils catschadurs cun cloms. Aschia san ils lufs seretrer. Igl ei denton era pusseivel ch'in luf lai passar in carstgaun senza seretrer. Pér suenter quella fasa da rodund ina mesura vegnan ils tgauns schai libers. Als menaders dils tgauns da saung cussegli l'uniun da schar liber il tgaun dalla corda pér il mument che la selvaschina blessada ei veseivla. La vischinanza al menader sei gi la megliera protecziun pil tgaun.

